

---

## УСТОЗ “ШУҲРАТ”И

Ўзбекистон Республикаси Президентининг “Ўқитувчи ва мураббийлар куни муносабати билан таълим-тарбия тизимида алоҳида ўрнатилган ходимлардан бир гуруҳини мукофотлаш тўғрисида”ги Фармони асосан Фарғона шаҳридаги 40-ихтисослаштирилган умумий ўрта таълим мактабининг математика фани ўқитувчиси Игорь Ян “Шуҳрат” медали билан тақдирланди.

Игорь Ян олижаноб вазифани ўз зиммасига олган, ёш авлодга илму фан ва ҳаёт сирларини ўргатишдек масъулиятли ишни адо этиб келаётган устозлардан. Ўқувчиларнинг ўзаро ҳурмат ва ҳамжиҳатликда таълим тарбия олишларида бу муаллимнинг ҳиссаси катта.

Ҳар бир устоз ёш авлодга таълим берар экан, ўқувчи тимсолида келажак кишисини шакллантиришни мақсад қилиб қўяди. Ана шу мақсад йўлида изланишдан, имкониятлар қидиришдан чарчамайди. Ўқувчиларга билим беришдан, изланишдан тинмайдиган ушбу халқ таълими ходимининг меҳнатлари эътиборсиз қолмади, албатта. Самарали меҳнатлари туфайли устоз 2015 йили “Йилнинг энг яхши ўқитувчиси” кўрик-танловининг республика босқичи ғолиби бўлиб, “Халқ таълими аълочиси” кўкрак нишони билан тақдирланди.

– Албатта, ўқувчи қалбига йўл топа олиш, уни илм олишга, фанга бўлган қизиқишини уйғота билиш устоз, мураббийдан ёниқ қалбни, касбига бўлган садоқатни, сабр ва матонатни талаб этади, – дейди унинг ҳамкасбларидан бири Евгений Ким. – Ҳамкасбим дарс давомида ҳар бир ўқувчини рағбатлантириб, фанга бўлган қизиқишини оширишга интилади. Бу йўлда эса қатор методик усулларни кашф қилади.

– Жамиятнинг бугуни ва келажаги, унинг маданий-маърифий ва маънавий салоҳияти таълим тизимининг қай даражада ривожланганлиги билан белгиланади. Таълим-тарбия тизимидаги ислохотларнинг муваффақияти кўп жиҳатдан ўқитувчи ва мураббийларга боғлиқ. Шу сабабли мамлакатимизда ўқитувчилар меҳнатини қадрлашга, уларга ҳар жиҳатдан ғамхўрлик кўрсатишга ҳаракат қилинмоқда, – дейди “Шуҳрат” медали соҳиби Игорь Ян.

2017-10-05 09:51:04